

Ekwo

O-zì-iphe

1 ¹Ọwa-a bụ olu O-zì-iphe; mbụ nwa Dévidi, bụ eze lẹ Jierúsalemụ. ²O-zì-iphe sụru-a: “Iphe-mmanụ yẹ iphe-mmanụ bụ iphe-mmanụ! Iphemiphe tukuru buru iphe-mmanụ!” ³?Bụ urwu gunu bẹ nemadzụ erita l'iphe, bukpo akanya, oosegbu onwiya lẹ mkpula ẹnyanwu-a?

⁴Ọobujeru; ọgbo ọwa -futa l'ọ nọo jasụ l'ọ bvụ. Ọgbo ọzo afutakwa bya anọo jasụ l'ọ bvukwapho. Obenu lẹ mgboko-a anọdujeepo g'ọ nọ. ⁵Enyanwu awajẹ chia nyihu; gbaru kparakpara; gbaphu azụ l'ẹka ooshije waa. ⁶Pherephere -zita l'ọ ziru laa ndohali; ziru laa isheli; ziphee mgburugburu mgburugburu; ziru laphu azụ l'ibiya ophu o shi wata ezizi. ⁷Nggele l'ophu asokota asoba l'enyimu. O lẹ enyimu te ejidu ejiji. O buru ẹka nggele shi asofutagbaa bẹ ọso-phukwapho azụ. ⁸Iphemiphe tuko tufukotawa ẹhu; k'ophu onu amaedu g'oo-pfu iya. Enya ta aphunyadaa ọzo l'ọ sụ lẹ ya huma-ghewaru; ophu nchị anunyadaa iphe l'ọ sụ lẹ ya nū-jiwaru. ⁹Iphe, shi dū nū bụ iphe, e-mechaa dū nū. O buru iphe, e mehawaru bẹ ee-mephu azụ; k'ophu bụ l'ọ tọ dudu iphe, bụ iphe ophúú lẹ mkpula ẹnyanwu-a. ¹⁰?O duru iphe, dū nū, nemadzụ a-sụ g'e lenu; l'iphe ọwa-a bukwa iphe ophúú? Iphe ono dujehaakwa ụzenya ụzenya. O dujehawa teme o rwua l'ogbo k'anyi. ¹¹Iphe, gbahawaru nū bẹ a ta nyataeduru; teme ophu e-mechaa dū nū bẹ ọgbo ophu e-mechaa tsota iya nū ta anyatakwapo.

Mmamiphe bụ iphe-mmanụ

¹²Sụ-a; mbedua, bụ O-zì-iphe-a shi buru lẹ Jierúsalemụ buru eze ndu Ízurelu. ¹³Mu woru ọkpoma zia l'egude mmamiphe choo mekpoo nwua iphemiphe, eemepoo lẹ mkpula igwe-a. O buepho l'ọo akanya aphụ bẹ Chileke meru g'unwu-eliphe seje. ¹⁴Mu lewaru ẹnya l'iphemiphe, eeme lẹ mkpula ẹnyanwu-a bya ahuma l'ọ tuko buru iphe-mmanụ; bya aburu achị pherephere ọso. ¹⁵Iphe, gberu nggo bẹ e tee mekotaekwa g'ọ pfuru nahamunha; ophu aagujedu iphe, adudu adudu ophu l'ogu.

¹⁶Mu bya arịa l'ime obu mu sụ lẹ mmamiphe bẹ mu makporu shii; mbụ maghata iphe, bukpo ndu vuhawa mu ọzo buru eze lẹ Jierúsalemụ.

Ọ tọ ɗụkpodaa gẹ mmamiphe; yee nkwaṃnya jeru iya, mu atụkoada ru mafushichaa. ¹⁷Mu bya eyemia ishi l'eme gẹ mmamiphe doo mu ɛnya; bya emekwapho g'eme bẹbeebēe doo mu ɛnya; waa eme eswe. Obenu l'iphe, mu nwutaru bu l'iphemiphe onoya bu achi pherephere oso; ¹⁸kele oke mmamiphe be oke nggumaphu tso l'azu; mbu le nemadzu -nodu aka amaru iphe; iphe, a-nodu akpatsu iya aphu aka shii.

Èhu-ùtso bu iphe-mmanu

2 ¹Mu bya aria l'ime obu mu su: “Gẹ mu bya ahụeshikwa èhu-ùtso ama gẹ mu maekwaru g'otso-be utso.” E mecha; mu humakwapho l'ono bukwaphe iphe-mmanu. ²Achi ochi be mu humaru l'oo iphe-eswe; teme ?o duru urwu, amadu e-rita l'èhu-ùtso too? ³Mu bya eyemia ishi l'angu me; gude iya duha onwomu obu; gẹ mu eshi nno nmata eme eswe akpa. Oke mmamiphe mu meleru-a; mu maru iphe, mu eme; k'ophu mu e-shi l'eka ono maru iphe, gbaru nemadzu l'ememe le nwujiku ole-mole, epe a-no le mkpula igwe-a.

⁴Mu bya eyemia ishi l'oke akanya. Mu bya akpushiaru onwomu ulo; bya agbashiaru onwomu opfu-vayinu. ⁵Mu bya agbashia mgbabu; bya akpushia eka atuta iphoro ye iya; bya eshi ishi lanu yeshia oshi-omi, dugbaa l'udu iya l'udu iya l'ime iya. ⁶Mu bya atushia okpuru, ee-gudeje agba mini l'oshi, mu yeshiru eyeshi. ⁷Mu bya agbashia ohu; unwoke me unwanyi; teme a nodu anwushikwaru mu pho ohu l'unuphu. Mu nwekwarupho eswi; nweru aturu; me egbu; mbu nweru iphe-edobe, kakota iphe, ndu vuhawaa mu uzo buru eze le Jierusalemu nwejeru shii. ⁸Mu bya akpaaru onwomu eku mkpola-ochaa waa mkpola-ododo; mekpoo eku, shi l'eka ndu eze; waa ndu ohozo. Mu bya aho ogo ebvu; unwanyi me unwoke; bya edophee onwomu unwanyi, bu ndu emeje g'ehu tsoo unwoke utso.

⁹Tobudu iya bu; mu bya enweru iphe, kakota iphe, ndu vuhawaa mu uzo buru eze le Jierusalemu shi nweru. Mu ha shii egube ono; bya egudekwapho mmamiphe mu gẹ mu gude iya. ¹⁰Ophu o dudu iphe, enya mu humaru; o gu mu egu, mu ahaje; ophu o dukwapho iphe, emeje g'ehu tsoo obu mu utso, mu hajeru ememe. Akanya, mu esekpo esese be emeje g'obu tso mu utso. O buru iphe ono bu urwu, mu ritaru iya. ¹¹Oke o bu; teke mu byaru bya egbu igo l'iphemiphe ono, mu gude eka mu mekota ono; mbukpoo iphe ono, mu sekotaru akanya iya ono; mu maru l'iphemiphe ono bukota iphe-mmanu yee achi pherephere oso; l'o to dudu urwu, nemadzu ritaru le mkpula enyanwu-a.

¹²Tobudu iya bu; mu bya eworu egomunggo mu zia l'ari ke mmamiphe; yee obvu-ememe; yee eme eswe. Mbu-a; ?buba gunu be onye a-no-tsota eze e-mebaa, a-ka ophu o mewaru? ¹³Mu bya ahuma le mmamiphe ka eme eswe ree; egube ono, iphoro ka ochii ree ono. ¹⁴L'onye maru iphe gude enya aphu uzo; obenu l'onye-eswe anoduje erwu ije orwu l'ishi. Mu

hūmakwanu l'ēphenebo ono a-tūko laa l'ite lanū. L'ōo iphe, meru onye mmamiphe bŭkwapho iphe, e-me onye-eswe.

¹⁵Mu bya arīa l'ime obu mu sū: “Iphe-a, meru onye-eswe-a l'e-mechakwaa mee mbēdua. ?Bŭhunu gūnu bē mu ritaru l'abūbu, mu bŭ onye maru iphe?” Mu byakwa arīa l'ime ōkpoma mu sū: “Iphemiphe-a tŭkokwarupho bŭru iphe-mmanū.” ¹⁶Noo l'ōo g'ōo-dŭ onye mmamiphe bŭkwapho g'ōo-dŭ onye-eswe. Ō tō dŭdu g'aa-nŏ-beru l'a nyatabuhu onye maru iphe; ōphu ō dŭkwapho g'aa-nŏ-beru l'a nyatabuhukwapho onye-eswe. Mu bya ahūmakwapho l'e -rwua l'atatiphu bē aa-tūko g'ēphe ha zōhakota azōha. L'ōo g'anwūhu e-gbu onye maru iphe bŭ g'oo-gbu onye-eswe. ¹⁷Noo g'o gude ndzŭ dŭ mu ashī; kēle iphemiphe, eeme lē mkpula ēnyanwu-a bŭkota mu mkpatsu-aphŭ. G'ō ha tŭkoru bŭkotaru mu iphemmanū bŭru achi phērephere ōso.

¹⁸Iphemiphe, mu seru akanya iya l'eliphe-a bya adŭkota mu ashī; eshinu mu e-mechaa haarŭ iya onye a-nŏ-tsota mu nŭ; ¹⁹l'ēbe ama onye ōbu ?ōo-bŭru onye maru iphe tōo onye-eswe? Ōle ōo onye ono, a-nŏ-tsota mu nŭ ono e-nweru iphemiphe ono, mu deru ēnya lē mini see akanya iya l'eliphe-a ono. Iphemiphe ono tŭkokwarupho bŭru iphe-mmanū. ²⁰Mu bya ataaha onwomu ūta sū: ?Bŭnaa gūnu bē mu gudekpōo seahaa akanya esese ōphu kpō lē mkpula ēnyanwu-a? ²¹Lē nemadzŭ e-gude mmamiphe iya yēe nkwamēnya iya seēbekpoo akanya; see ērengete iya; l'o woru iphemiphe ono, o nweru ono haarŭ onye eriduru aphŭ iya. Mu bya elee iphe ono ēnya hūma l'ō bŭ iphe-mmanū; bya abŭru ējo-ememe. ²²Mbŭ-a; ?bŭ gūnu bē nemadzŭ eseta l'akanya; yēe photophoto, ōoku gude erigbu onwiya l'aphŭ ozi, ooje lē mkpula ēnyanwu-a? ²³Kēle anōno, ō nŏ ndzŭ l'ophu bē ō nŏkota iya eje iphe-ēhuka; ozi, ooje nŏdu abŭjeru aphŭ dŭru iya; o -be l'ēnyashi; egomunggo ta anŏdudu iya l'ēka lanū. Sŭ-a; iphemiphe ono tŭkokwaru bŭru iphe-mmanū.

²⁴Ōo ya bŭ l'iphe, ka ree bŭ gē nemadzŭ rije g'ō dŭ iya; ngŭje g'ō dŭ iya; akanya, oose eji iya ēpho; kēle ono bē mu hūmaru l'o shi l'ēka Chileke. ²⁵Kēle-a; Chileke ta adŭ; ?bŭ onye gege erije nri? Tōo ?bŭ onye bē ēhu gege atsoje ūtso? ²⁶Kēle Chileke emeje g'onye dŭ iya l'obu bŭru onye maru iphe; kwaa ēnya; tēme ēhu atsoje iya ūtso. Obenu l'onye iphe-ēji bē ōolojeru iphu ye l'akpa ēku kŭberu onye dŭ Chileke l'obu. Onoya bŭkwarupho iphe-mmanū bya abŭru achi phērephere ōso.

Iphemiphe nweru teke emeje iya

3 ¹Iphemiphe nwekwarŭ teke eemeje iya;
mbŭ l'iphemiphe,
eeme ememe nweru
teke eemeje iya lē

- mkpula igwe-a.
 2 Teke aanwụ nemadzu
 anwụnwu dụ;
 teke aanwụhu anwụhu
 dụkwapho.
 Teke eemebe iphe l'alị dụ;
 teke aakpata iphe,
 e meberu l'alị akpata
 dụkwapho.
- 3 Teke eeme g'a nwụhu
 anwụhu dụ;
 teke eeme g'a ka mma
 l'iphe-ememe dụkwapho.
 Teke eetsukpọshi etsukpọshi
 dụ;
 teke aakpụ-li akpụ-li
 dụkwapho.
- 4 Teke aara ẹkwa dụ;
 teke aachi ọchi dụkwapho.
 Teke aagụ aphụ dụ;
 teke eete ebvu dụkwapho.
- 5 Teke eetuphashị mkpuma
 etuphashị dụ;
 teke aatutukobe mkpuma
 atutukobe dụkwapho.
 Teke aanma akpa dụ;
 teke eesela onwonye
 azu dụkwapho.
- 6 Teke aachọ iphe achọcho dụ;
 teke aamị ẹnya l'iphe
 dụkwapho.
 Teke aakwakọbe iphe
 akwakọbe dụ;
 teke eetupha iphe etupha
 dụkwapho.
- 7 Teke aalajashị iphe alajashị
 dụ;
 teke aagbakwa iphe
 agbakwa dụkwapho.
 Teke aanọdu nggujungguji
 dụ;
 teke eeye ọnu l'opfu

dụkwapho.

⁸ Teke eeye obu du;
teke aadu ashị
dụkwapho.

Teke aalwu ọgu du;
teke nchi-adu-doo
dụkwapho.

⁹?Bụ ọnu bẹ onye akanya erita l'akanya, oose? ¹⁰Mu humawaru ivu, Chileke boru ndiphe. ¹¹O deru ọnya lẹ mini mee iphemiphe; ọ ọdu l'ògè iya. Ọ bya emee amadu g'ọ rije k'ojeje. Ọle amadu ta adudu ike ma-beru iphe, Chileke meru e-shi l'ishi jeye l'eka ọ bọru. ¹²Ọphu mu maru bu l'ọ tọ dudu iphe, kabaru amadu ree; abudu g'ehu tsoje iya utso; loome iphe, du ree teke ọ nọ ndzu. ¹³G'on'yemonye rije g'ọ du iya nguje g'ọ du iya; akanya, oose eji iya ẹpho. Ọo ono bu iphe-oma, Chileke eme.

¹⁴Iphe, mu maru bu l'iphemiphe, Chileke eme a-nọ ojeje. Ọ tọ du iphe, ee-yekwa iya eyekwa; ọphu ọ dudu iphe, ee-wofu iya ewofu. Iphe, o gude mee ya nno bu g'amadu humaje iya tsua yẹbe Chileke ebvu. ¹⁵L'iphemiphe, du nu shikpoo dūhawaa. Iphe, l'e-mechaa du nu shikwapho dūhawaa. Ọ buri Chileke e-me g'a nyata iphe, a zoharu azoha.

Ejo-ememe, jiru mgboko

¹⁶Mu byakwa ahuma iphe ozo lẹ mkpula ọnyanwu-a: L'eka e gege anodu kpee ikpe, pfuru nhamunha bẹ a gbẹ ọdu eme ejo-iphe; eka e gege anodu eme iphe, pfuru oto bẹ a nokwapho eme ejo-iphe. ¹⁷Mu bya aria l'ime obu mu su: "Chileke e-mechakwaa tuko ndu pfuberekoto me ndu ejo-iphe kpee ikpe; kele iphemiphe nweru ọgè; mbu l'iphemiphe, eeme ememe nweru ọgè teke eemeje iya." ¹⁸Mu byakwa aria ozo su: "Chileke ahujekwa nemadzu ama gude goshi phe l'ephe l'anu-egbudu bu iphe lanu. ¹⁹Ọo iphe, eme nemadzu emekwapho anu-egbudu; mbu l'ọo iphe, swiru anu-egbudu swiru nemadzu. Ọo g'onwu egbu ọphuu bu g'oogbu ọphuu; ọ buri g'ọphuu atụ unme bu g'ọphuu atụ. Ọ tọ dudu iphe, nemadzu nweru gude ka anu-egbudu. Iphemiphe tukoru buri iphe-mmanu. ²⁰G'ephe ha tukoru ala eka lanu. G'ephe ha tuko shi l'aja; ọ buri l'aja bẹ ephe tukoru ala. ²¹?Bụ onye maru me maa nemadzu alajephe l'eli eviya; k'anu-egbudu ọdu alaje l'ali?" ²²Mu huma l'ọ tọ dudu iphe, kabaru nemadzu ree, abudu g'akanya, oose tso iya utso; kele owa iya bu okiphe iya. Kele-a; ?bu onye suru iya eduphu azu g'ọ bya ahuma iphe, l'e-mechaa nwua l'okotazu iya?

4 ¹Mu byakwa elee ọnya bya ahuma mkpawere, dugbaa lẹ mkpula ọnyanwu-a. Mu bya ahuma ọnya-mini ndu eeme mkpawere; l'ẹbe ephe enwe onye gberuma. Teme ndu ono, eme phe ewere ono nwekwarupho iphe, bu agbaru-ike phe; obenu ephebedua te nwedu onye asu phe

gberuma. ²Mu sù lẹ ndu ọnwu gbuwaru, bụ iya bụ ndu ọphu nwùhuwara anwùhu; bẹ ẹhu kakwa ụtso eme lẹ ndu nọkwadu ndzụ nta-a. ³Ọle onye ọphu ẹhu-ụtso nkiya ka k'umadzu labọ ono shii bụ onye ọphu e teke anwukpodanu anwunwu ọphu; mbụ onye ọphu teke ahumakpodanu ẹjo-iphẹ, eeme lẹ mkpula ẹnyanwu-a ahuma ọphu.

⁴Noo ya; mu bya ahuma l'akanya, eesekpọ esese; mẹ ọphu e setawaru eseta bụ ẹka o shikọta bụ l'ekoru nwibe onye okophoo. Onoya bukwapho iphe-mmanụ; bya aburu achi pherephere ọso. ⁵Onye eswe achijeru ẹka ye l'iphu ụtapfu bya eria onwiya la kẹ mmanụ. ⁶Ọle ọ bụ; ọ kakwa ree l'e nweru iphe, jiru mkpoji-ẹka lanụ; ẹhu dū onye ọbu guu; eme l'a chiru ẹka kwẹe l'akanya; eme g'ẹka labọ ji, bụ iphe, tukurorū bụru achi pherephere ọso.

⁷Mu byakwa ahuma iphe-mmanụ ọzo, dū lẹ mkpula ẹnyanwu-a. ⁸Ọ dūru nwoke, bụ nkinyi, enwedu nwa nwoke; ọphu o nwedu nwune nwoke. Ọ nọdu anọduje ese akanya mkpulumkpuru. Ọphu ẹku, ọ kpatarū ẹjijedu iya ẹpho ejiji. Ọphu o teke aji-swee onwiya sù: “?Bunaa onye bẹ mu eseru akanya-a? ?Bunaa gunu bẹ mu anashinaa onwomu ẹhu-ụtso ẹgube-a?” Iphẹ, dū nno bukwa iphe-mmanụ; bya aburu nsegbu akanya.

⁹Adū ẹbo kakwa ree eme l'aswi nkinyi onye; kẹle umadzu labọ a-kakwa onye lanụ eseta iphe. ¹⁰Noo lẹ teke onye lanụ daru iko; onye ọphuu akwo-lia ya. Obenu l'onye daru nū; ọphu o nwedu onye kwo-lia ya dukwa k'ayoru ọshi. ¹¹Ọzoo bụ l'umadzu labọ -zẹe l'oshi bẹ oyi ta atsudu phe. Obenu l'ọ -būru onye lanụ; ?denu g'ee-shi g'oyi ba nọdu atsū iya? ¹²Onye lanụ bẹ eemekpejekwa. Obenu ?a dū ẹbo ẹbe aakpa onye? Teme okpuku, a chiru ẹto ẹto swia bẹ agbabu iya ta adukwa nphe.

¹³Nwokerọbya, enwedu iphe bya amaru iphe kakwa ree eme l'onye eze, nweru iphe bya aburu onye-eswe; buri opfu nkiya anu nkiya; ¹⁴m'obeta nwokerọbya ono shi l'ọka-mkporo; ọzoo l'unuphu ndu akpa nri futu bya abahu l'okwa eze iya. ¹⁵Mu bya elee ẹnya huma g'on'yemonye, nọ ndzụ lẹ mkpula ẹnyanwu-a wufutaru je awu-tsoru nwokerọbya ono; mbụ onye eeme g'e gude dochia ẹnya nwoke ono, nweru iphe ono. ¹⁶Ndu wu-tsoru nwokerọbya ono bukwa aguta aguta. Obenu l'ogbo ọphu e-mechaa bya nū ta abyadu ekwe l'ọ duru iphe, nwokerọbya ono metakporu emeta ililekpoo. Ono bukwa iphe-mmanụ; bya aburu achi pherephere ọso.

Eri angu bụ iphe-mmanụ

5 ¹Makwaru g'i gude eje ije mẹ i nọdu abahu l'eze-ulo Chileke. Li jeru angabe nchi l'iphe, eepfu kakwa ree eme l'i jeru egwe ẹja onye-eswe; kẹle ndu eswe ta amajekwaru l'oo iphe-ẹji bẹ ẹphe eme nno. ²G'ire ba atsunukakwa ngu nko; ọphu okpoma anodukwa etsu ngu gbudugbudu k'epfukebe opfu l'iphu Chileke; kẹle Chileke nokwa l'igwe; gubedua nodu l'eliphe-a; noo g'o gude opfu je alwa ngu ali l'onu! ³Ọo g'aarwoje nrwo mẹ

oriri paa ẹka-a bu ẹ mkpokoro opfu apajẹ ẹka me e pfunuka opfu igwerigwe. ⁴I -kwee ukwe emeru Chileke iphe; ba nokwa ọdu ememe iya; kele umere onye-eswe ta adujekwa Chileke ree. ⁵Ọ kakwa ree me i ribuduru angu eme iphe ililekpoo; eme l'i rifuru angu ememe iya; e mechaa ophu i meeduru iya g'i pfuru. ⁶G'ọ to bukwa iphe, i pfutaru l'onu e-duba ngu l'eme iphe-eji. Ophu i sukwa onye eje ozi l'eze-ulo Chileke l'iphe ono, i rifuru angu iya ono be i ti madu teke i pfuru iya. Odumeka be ii-gudekwa onu pfuta iphe, e-ghu Chileke eghu; l'o mebyishia eguru iphe, i shihawaa mee. ⁷Mbu-a; arwo ikpoto nrwo; yee epfu ikpoto opfu tukokwaru buru iphe-mmanu. Oo ya bu le-a; tsujeepho Chileke ebvu.

Ẹku bu iphe-mmanu

⁸O -duru ẹka i no; i huma l'e me ndu ukpa ewere l'eka ono; k'ophu bu l'e te kpejedu phe ikpe, pfuru oto; ophu e mejeduru nemadzu iphe, rwuberu iya nu; g'ọ to dukwa ngu biribiri; kele onye ha shii be onye ozo, ka iya shii arajekwaru akpuru-anya; teme l'ọ dukwarupho ndu ozo, akajẹ ephenebo ono shii.

⁹Iphe, e meberu l'egu be onyemonye atukojekwa keta oke l'urwu, du iya nu; teme onye eze nodu eritajekwapho urwu l'iphe, a kpataru l'egu.

¹⁰Onye yeru anya l'okpoga be okpoga te ejijekwa epho. Ophu urwu ejijedu onye yeru anya l'akpa ẹku ejiji. Ono bukwapho iphe-mmanu. ¹¹Ẹku -nodu abya; ndu e-ri iya nu abyakwapho. ?Bukwanu gunu be onye nwe iya nu erita iya; abudu g'o le iya l'anya? ¹²Onye ese akanya be mgbenya atsojekwa utso; ?me o riru nri shii; ?me o riru nwanshii. Obenu l'oke ẹku, onye nweru iphe kparu arwuje iya mgbenya.

¹³Ọ duru akpamara, mu humaru le mkpula anyanwu-a. L'eku be onye nwe iya nu kparu dobe g'o gburwashị iya ehu. ¹⁴A nonyaa uburu bya ebuta nwoke ono; ẹku iya ono laa l'iswi; ophu o dudu ẹku iya ono ophu o doberu nwa iya; kele o buueberu. ¹⁵Ọ kwa g'ọ du teke o shi l'epho ne iya bu g'oo-du laa; mbu l'ọ gba ẹka teke o byaru; ophu o dudu akanya ono, oose ono, duru ophu oo-gude ala. ¹⁶Ono bukwapho akpamara. Mbu l'ọo g'ọ du teke o byaru bu g'oo-du laa. ?Bu urwu gunu be o ritaru l'akanya, o seru doberu pherephere; ¹⁷yee anono, o nokotaru l'ochii l'eliphe-a mgburugburu takota kpookpookpo; bya atsukota pfupfufu; teme e mekota iya iphe ehu-eghu?

¹⁸Oo ya bu l'iphe, mbedua humaru l'ọ du ree; bya aburu iphe, gbaru l'ememe bu g'amadu ria g'ọ du iya; ngua g'ọ du iya; tusaru ehu l'akanya, oose le mkpula anyanwu-a le nwujiku olemole, oo-no l'eliphe-a, bu nwophu Chileke nuru iya; kele oo ono bu okiphe nkiya. ¹⁹Teme onyemonye, Chileke nuru ẹku; yee iphe-enweru; yee ike, oo-gude ria ya; mbu onye duru ike nata oke ophu o keru nu iya; g'onye ono gudekwa ehu-utso see akanya, oose; l'ono bukwa iphe-oma, shi Chileke l'eka. ²⁰Ẹgube onye

ono ta adukwa teke oobvujeru shii ari ke nwujiku olemole, oo-no le mgboko-a; noo kele Chileke meru; ehu-utso ji iya obu; k'ophu bu l'uzo ari udu oriri ono ta aduduru iya.

6 ¹O nwekwarupho ejo-iphe ozo, mu humaru le mkpula enyanwu-a. Iphe ono buru oke ivu, anyitsuta nemadzu l'erwa. ²Le Chileke emeje nemadzu g'o nweru eku; yee iphe-edobe; teme g'o buru onye aakwabe ubvu; k'ophu bu lo to dudu iphe, agu iya nu, ete erwujedu iya aka. Obenu le mechaaru ophu Chileke ekwedu g'o ria ya; o buchiaru onye ohozo riru iya. Iphe ono buru iphe-mmanu; bya aburu akpamara.

³Nemadzu a-nwutachakpoo unwegirima nwu-rwua ukporo ise; bya akakpo nka shingushingu; ole o to dukpodaa g'o kahabe nka; o -buru lo to riduru eku ono, o seru akanya iya ono; ophu e liduru iya okpobe elili be mbedua sukwaru le nwa, nwuhuru l'epho teme a nwua ya ka iya mma. ⁴L'egube nwa ono be iphe, o byaru ije iya bukwa ke mmanu; kele o tseru ishi l'abalashija; epha nwata ono no lime ochii phuhu. ⁵A makwaru-a lo toko huma-swee enyanwu; ophu o dudu iphe, o maru; ole o kaepho nwoke pho enweru ehu-guu; ⁶m'obetakpokwaru nwoke ono no ndzu noghata unu apha ise; l'ebe o ri eku, o setaru. Noo kele oo l'eka lanu be ephe tukoru ala.

⁷Akanya, nemadzu esekpo esese bukwa onu be a tukoru iya eseru; ole onu teke asu-swee le ya ritawaru g'o du iya ree. ⁸?Bu gunu be onye maru iphe gude ka onye-eswe? ?Bu urwu gunu be onye ukpa ritaru l'amaru geeme umere, du ree l'iphu ndiphe? ⁹Iphe, nemadzu nwewaa enwenwe kakwa ree eme l'ophu agu iya g'o nweru iya; obenu lo toko rwudu iya aka. Ono bukwapho iphe-mmanu bya aburu achipherephere oso.

¹⁰Iphemiphe, du adudu nwehawaru epha; teme iphe, nemadzu bukpoo be a mahawaru l'ono bu iphe, oo-buru; ophu nemadzu ejejedu awata abaru onye ka iya ike mba. ¹¹Opfu -paa igwe; mkpokoro iya aka shii. Goshinu mu urwu, egube iphe ono abaru nemadzu. ¹²?Bu onye maru iphe, du nemadzu ree nta-a, o no ndzu-a; mbu le nwujiku olemole, o no mkpokoro ndzu l'eliphe-a, eme pherephere g'ononyo-a? ?O dukpooru onye a-du ike karu iya iphe, e-mechaa mee le mkpula enyanwu-a me o -nwuhuchaa?

Mmamiphe

7 ¹Epha oma kakwa manu-mbeleke, eshi mkpo ree; teme mboku, nemadzu nwuhuru ka ree eme le mboku, a nwuru iya anwunwu.

²Eje l'unuphu, agalaba nwuru kakwa ree eme leje aka aabo iphe. Noo kele anwuhu bu iphe, no swiru onyemonye. Ge ndu ophu no ndzu nyatajekwa loo-dukwaphe pho nno.

³Aphu kakwa ree eme l'achi ochi; kele eeshije l'iphu, adu eji mee g'obu tusahu.

⁴Èka obu onye maru iphe anọduje bụ l'unuphu, agalaba nwuru; obenu l'èka obu k'onye-eswe anọduje bụ l'èka eeri gwọogwoo.

⁵Angabẹ nchị lẹ mba, onye maru iphe abaru ngu kakwa ree eme l'anga-bẹ nchị l'ebvu, ndu eswe agu.

⁶Ọo gẹ nkụ-agbagba anọduje agba kpitikimu kpitikimu l'ọku, e shiberu ite-a bụ g'ochi, onye-eswe achị aduje. Ono bụkwapho iphe-mmanu.

⁷Onye maru iphe; ọ nọdu eme nemadzu ewere buakwaa onye-eswe; ọ buru egube ono bẹ eri uphalazu emebiyi obu nemadzu.

⁸Teke eemeghe iphe emeghe kakwa ree eme lẹ teke a wataru iya awata.

Onye nweru nshirima kakwa onye eku onwiya ree.

⁹Ta abukwaru onye obu-oku; kele ọo onye-eswe edoje opfu l'okpoma.

¹⁰Ba sukwa: “?Bunaa gunu meru g'o gude teke ndiche ka nta-a ree?” Kele egube aji ono te erwubeduru onye maru iphe.

¹¹Ọ kwa g'enweru iphe du ree bụ gẹ mmamiphe dukwapho; kele onye maru iphe bẹ iphe kwewaru lẹ mkpula enyanwu-a. ¹²Ọo g'okpoga edomije onye nweru iya nu-a bụ gẹ mmamiphe edomijekwapho onye maru iphe. Obenu l'èka amaru iphe gude kangoo bụ l'onye nweru mmamiphe akajẹ nka shii.

¹³Leanaro enya l'ozì, Chileke eje. ?Bụ onye suru eme iphe, Chileke meru o gbee nggọ g'ọ pfuru nhamunha? ¹⁴Mboku -duru ngu ree bụ g'i tee eswa; teke mboku dukwanuru ngu eji g'i nyatajẹ l'ọ kwapho Chileke meru mboku oma bya emee njo mboku. Ọo ya bụ l'ọ to dudu onye maru iphe, a-nwuru iya nu l'iphu.

¹⁵Lẹ mkpokoro ndzu-a, mu dzu-a bẹ mu hūmaakwaru iphe-a ephenebo. Mbụ lẹ mu hūmaru onye pfuberekoto èka ọola l'iphe, pfuru ọto; bya ahuma onye ejo-iphe èka ọoka nka eje emekwapho ejo-iphe, oome.

¹⁶Ta apfubenukakwa èka ọto; ophu i manukakwaru iphe; ono bukwa eyi onwongu iyi. ¹⁷Be menukakwa ejo-iphe; ophu i bukwaru onye-eswe. Ono e-mekwa l'i nwuhu teke i tigi nwuhudu. ¹⁸Iphe, ka ree bụ g'i gude ophuu gude ophuu; l'onye atsụ Chileke ebvu ta adukwa iphe, o byiru èka te eke-duru nu.

¹⁹Mmamiphe emejekwa onye nweru iya nu g'ọ ka umadzu iri, bụ ishi mkpukpu okpehu.

²⁰Ọ to dukwa onye pfuberekoto l'eliphe-a l'ophu, a-sụ l'ọ toko meswee iphe-eji.

²¹Ta angabẹ-dzujekwaru nchị l'iphe, ndiphe epfu; odumeka bẹ ii-numakwa èka onye-ozì ngu akọ ngu onu. ²²Teme i mawaru-a l'onwongu lẹ gubedua kowaru ndu ozo onu ugbo olemole.

²³Iphemiphe ono bukota mmamiphe bẹ mu gude hua ya ama; mbụ lẹ mu suru gẹ mu bya abukpoerupho onye maru iphe. Obenu lẹ mu jeru iya ememe; ophu mu asudu iya. ²⁴Mu maru l'iphe ono, eeku mmamiphe no

uzenya uzanya; bya adu omilomi shii; k'ophu bu l'ọ to dudu onye suru iya achọ-vu. ²⁵Mu bya aghaa iphu l'iphe edo ẹnya; bya egbushi ikpere mea-haa ge mu maru: ?mu a-rwavu ẹka mmamiphe? mbu ge mu maru g'iphe mgboko eje ala; mu amakwarupho g'eme ejo-ememe; waa eme beebabee bu-be iphe-eswe.

²⁶Mu huma iphe, ka anwuhu atso ilu; mbu nwanji, obu iya bu onya; bya aburu ugbu, e gude anmata ndiphe; g'ọ chi mkporo l'eka labo k'atuphu onye oo-buru yee ya. O buepho onye du Chileke l'obu be a-du ike nahu iya nu. Obenu l'onye iphe-aji be oo-zu gburumu pfurii. ²⁷O-ziphe-a sukwapo: "Unu lekpodapho;" "wakwa iphe, mu rwavuru baa." "Mu shi abujeru; mu -wota owa; mu eyekoberu iya ozo; ge mu shi nno maru g'iphemiphe gude anwukota. ²⁸O buru teke mu achọ iya ophu mu ahuma-duru iya ono; be mu humaru ndu du unu labo l'ukporo iri; o buru nwoke lanu kpoloko bu onye obu guru iphoro. Obenu l'ọ to dudu nwanji lanu, mu humaru, obu guru iphoro l'ime phe. ²⁹O buru iphe, mu cho-vuru kpoloko bu le Chileke meru nemadzu g'ọ buru onye obu guru iphoro. Obenu le nemadzu wataru akpa ejo uzo."

8 ¹?Bu onye a-su le ya maru iphe? ?Bu onye be iphemiphe doru ẹnya? L'ọ kwa mmamiphe emeje g'iphu tusahu nemadzu; mbu loomeje g'iphu gbapfube-buhu nemadzu agbapfube.

Eme iphe, onye eze pfuru

²Mejekwa iphe, onye eze suru g'i mee. Iphe, mu gude pfua nno bu l'i riburu angu l'iphu Chileke l'ii-meje iya. ³Te erijekwa nkwoli l'iphu onye eze; ophu i pfujekwaru l'ejo-iphe; kele o kwa iphe, du eze ree be oomeje. ⁴Su-a; eshinu iphemiphe, onye eze pfuru buwaa ẹka o jeberu o gburu; ?bu onye be onu dukwanu k'asu iya: "?Bu gunu be iime nno?" ⁵Onyemonye, eme iphe, eze pfuru ta adukwa iphe byaru eme iya nu. O bukwanuru onye maru iphe a-maru teke oo-me iphe, o pfuru; maru g'oo-gude mee ya. ⁶A makwaru-a l'iphe-ehuka, nemadzu eje buwaa oke ivu, anyi erwa dapyabe iya. Obenu l'iphemiphe nwekwaru ogè; nweru g'eegudeje eme iya. ⁷Eshinu o dudu onye maru iphe, e-me l'iphu; ?bukwanu onye a-su iya l'owa-a iphe, e-mechaa mee nu baa? ⁸O to dukwa onye suru esede pherephere; nokwapo g'ọ to dudu onye suru esede ndu iya me mboku anwuhu iya ruwepho. Oo g'ọ to dudu onye aagufuje g'ọ to jeshi ogu; me a -nodu alwu ogu-a; bu g'eme ejo-iphe ta abyadu aha ndu eme iya nu.

Ndu ejo-iphe waa ndu pfuberekoto

⁹Iphemiphe ono be mu humaru ge mu byaru bya eworu egomunggo mu zia l'iphemiphe, eemekpoo ememe le mkpula ẹnyanwu-a. Mbu teke ndu-ishi anoduje emekpa ndu no phe l'eka ehu. ¹⁰Mu bya ahuma ẹka eeli ndu ejo-iphe. Mbu ndu ono, shi anoduje eje nggede eje nggede alwa l'eze-ulo

Chileke ono; mbụ ndu ono, e shi anọduje aja ajaja l'ime mkpukpu ono, ẹphe shi nọdu eme ẹjo-iphe ono. Ẹgube iphe ono bukwapfo iphe-mmanu.

¹¹ Ọo kele e teke ahụ-kebedu ndu ẹjo-iphe ahụhụ ẹgwegwa meru iphe, ọ buẹpho iphe, jiru ndiphe obu bu eme ẹjo-iphe. ¹² Ọ tọ dukwa m'obeta onye ẹjo-iphe mechakpoo iphe-ẹji merwua ya ugbo ukporo ise; bya akaẹle-a nka nọo ọdu; be mu maẹkwarupho l'onye atsu Chileke ebvu be ọo-karu ree; mbụ ndu akwabẹ Chileke ùbvù. ¹³ Kele ndu ẹjo-iphe be ọ tọ dukwaru le ree; ọphu ndzụ phe etsekwa rigorigo g'ononyo. Noo lẹphe ta atsudu Chileke ebvu. ¹⁴ Ọ dukwarupho iphe ozo, bu iphe-mmanu, du l'eliphe-a. Iphe ono buru l'ọ duru ndu pfulerekoto, anatajẹ ugwo, e gege apfu ndu ẹjo-iphe; bya adukwarupho ndu ẹjo-iphe, anatajẹ ugwo, e gege apfu ndu pfulerekoto. Ono be mu sukwarupho l'ọ bu iphe-mmanu.

¹⁵ Ọo ya bu l'iphe, mbẹdua ari l'ọ ka ree ge nemadzu meje iya bu g'ehu tsoje iya utso. Kele ọ tọ dudu iphe, kabaaru nemadzu ree le mkpula ẹnyanwu-a, abudu g'o rije g'ọ du iya nguje g'ọ du iya buru onye ẹhu atso. Ọo ya bu; ẹhu atsokwanu iya me ọ -nọdu ese akanya iya le ndzụ owa-a, Chileke nuru iya le mkpula ẹnyanwu-a.

¹⁶ Teke mu shi woru egomunggo mu zia l'amaru iphe, bu mmamiphe yee ele ẹnya l'akanya, amadu ese l'eliphe-a; mbụ l'akanya, oosekota-je eswe l'enyashi; mgbenya te eshitadu iya ẹnya; ¹⁷ be mu byaru ahuma iphemiphe, Chileke meru; bya amaru l'ọ tọ dudu onye iphemiphe, eme le mkpula ẹnyanwu-a byaru edo ẹnya. Nemadzu a-tukokwa ike iya mekota g'o doo ya ẹnya; ole ọ tọ dudu onye a-du ike arwavu iya l'eka. Onye mmamiphe -suchakponu le ya maru iya be o too dokwanu iya ẹnya okpobe edodo.

9 ¹ Mu bya atuko iphemiphe ono rija bya elechaa ya ẹnya maru l'onye pfulerekoto; me onye maru iphe; me iphemiphe, ẹphe eme tukoru dukota l'eka Chileke. Temẹ ọphu ọ dudu onye amaje ọphu e doberu iya ?bu n-yemobu to ndumashi? ² G'ẹphe ha bu iphe lanu anwukota l'ehu phe; mbụ onye pfulerekoto me onye ẹjo-iphe; onye eme ree me onye eme ẹji; onye aaso nso me onye a ta sodu nso; me ndu agwa iphe; me ndu ta agwadu. Ọo g'oonwu l'ehu onye du ree bu g'oonwu l'ehu onye iphe-ẹji. Ọ buru g'oonwu l'ehu onye guru enwa bu g'oonwu l'ehu onye atsu ebvu agu enwa. ³ Waa iphe, bu ẹjo-iphe, du l'iphemiphe, anwukota le mkpula ẹnyanwu-a baa. Iphe ono bu l'onyemonye bu iphe lanu anwukota l'ehu phe. Temẹ ọphu ka njo buru l'obu amadu buẹpho ẹjo-iphe jiru iya; temẹ eme iphe eswe nọdu aduje phe l'obu eka ẹphe nọ ndzụ; ole e -mechakwa-a, onye ono alakwaa maa. ⁴ Ole ọ bu; onyemonye, nokpo ndzụ be nweẹkwarupho iphe, oole ẹnya iya. Le nkuta, nọ ndzụ kakwa oduma, nwuhuru anwuhu mma. ⁵ Kele ndu nọ ndzụ maru l'ẹphe e-mechaa nwuhu anwuhu. Obenu le ndu nwuhuru anwuhu ta aduedu ọphu ẹphe maru. Ndu nwuhuru anwuhu te enweedu obunggo; temẹ ọphu a nyataeduru phe ililekpoo. ⁶ N-yemobu onye ono; yee

ndumashi iya; me okophoo ya g'ephe ha tukowaru phukashihu. Ophu o duedu iphemiphe, eeme le mkpula enyanwu-a, aka iya dukwadu.

⁷Oo ya bu; g'ehu tsoje ngu utso me i nodu eri nri ngu. Temē l'iimeje eswa l'ime obu ngu me i nodu angu mee ngu; kele o kwa nta-a be iphe, iime du Chileke ree. ⁸Yejekwa uwe, acha phuuphuu tekenteke; ophu manu, eshi mkpo abvujekwa ngu abvubvu l'ishi. ⁹G'ehu tsoje ngu utso gu le nyee ngu ono, i yeru obu ono; jeye g'unu a-no-bekporu ndzu le mkpokoro ndzu-a, Chileke nuru ngu le mkpula enyanwu-a. Mbū le mkpokoro mboku-mboku ono, Chileke nuru ngu ono; waa akanya, iisegbu onwongu le mkpula enyanwu-a be bukwa ehu-utso ono, bu okiphe, i ketaru iya. ¹⁰Iphe, aka rwubekporu ngu l'ememe; gude ike ngu l'ophu mee ya; kele ali-maa, bu aka iije be ozi ta adudu; ophu achi idzu iphe, ee-me adudu iya; teme ophu mmamiphe yee nkwamenya adukwa iya pho.

¹¹Su-a; mu humakwarupho iphe ozo le mkpula enyanwu-a. O to budu onye ka oso agbataje oso; ophu o budu onye okpehu ka be alwukpeje l'ogu. Temē ophu o budu onye maru ekwo kachaa enweru nri; ophu o budu onye maru iphe kachaa enweru iphe; ophu o budu onye kachaa amaru ekwo be eemejeru iphe-oma. G'ephe ha be eso yee ehēni tukoru etsokota. ¹²Ozokwapho bu l'o to dudu onye amajeru teke oo-byaru iya. Oo g'eegudeje ejo ugbu nmata ema-a; bya aburu g'aagbabeje onya nmata enu-a bu g'ejo mboku adapfuje ndiphe; mbu l'oozujee phe pho gburumu pfurii teke epe te eledu enya iya.

Mmamiphe kakwa eme eswe ree

¹³Mu byakwapho anodu le mkpula enyanwu-a huma iphe, mmamiphe meru; o du mu biribiri. ¹⁴O duru mkpukpu lanu, ha nwanishi, nonu; o buru-a nwa umadzu olemole bu iya. Onye eze, okpehu du shingushingu bya afuaru mkpukpu ono; bya egude ojogu iya no-pee ya mgburugburu; bya akpo-chia ya mkpo-chi. ¹⁵O dukwanuru nwoke lanu, bu le mkpukpu ono. Nwoke ono akpa nri; ole o bu onye maru iphe. O buru iya mechaaru gude mmamiphe iya dzoo mkpukpu ono. Ole o to dudu onye nyatajeru nwoke ono, akpa nri ono. ¹⁶O buru iphe ono meru g'o gude mu su le mmamiphe kakwa okpehu ree. Ole onye ukpa be a taa gubejedu mmamiphe nkiya iphe; ophu o dudu onye angaje nchi l'opfu iya. ¹⁷Onye maru iphe -to nwehu pfua opfu be o kakwa ree gi ngabe iya nchi eme le gbagbagba, onye-ishi ndu eswe ara. ¹⁸Mmamiphe kakwa ngwogu ree. Obenu l'onye iphe-eji lanu emebyijekwa iphe, du shii.

10 ¹Ijiji, nwuhuru anwuhu -daba le manu-mbeleke be oomeje iya looshi tukurubaa. Noo g'umere onye-eswe; g'o hahabe nwanishi emeje mmamiphe yee akwabe ubvu g'o to du iphe, oo-bu.

²Egomunggo onye maru iphe emeje iya g'o mee iphe, pfuru nhamunha; obenu l'onye-eswe be egomunggo iya emeje loome ekicha ekicha. ³O to

dudu m'obeta o buru le gbororo be onye-eswe eje ije; l'oogoshiēpho le ya bu itorito; mbu l'oonodujeepho egoshi onyemonye le ya bu idokpamkpata.

⁴ O -buru l'onye bu ishi be i meru; ehu wata eghu eghu; ta agbeshikwa l'eka i no su l'ilawa. Jichikwaa obu oyi; noo l'odoo emeje g'a palia pazeta.

⁵ O nweru ejo-iphe ozo, mu humaru le mkpula enyanwu-a. Iphe ono buru emeswe, shi l'eka onye bu ishi. ⁶ Aagbeje bya ewota onye-eswe je edobe l'onodu, ha shii; bya ewota onye nweru iphe dobe l'onodu, ha nwanshii. ⁷ Mu humaru eka o gbē buru ndu bu ohu gbē nodu l'eli inya; ndu bu unwu eze gbēchia gude okpa eje ge ndu bu ohu.

⁸ Su-a; o kwa onye buru nsu e-mechaa dalahu le nsu obu. O buru onye epyo mgbaka igbulo be agwo ataje. ⁹ O kwa onye akukposhi mkpuma be oomekaje iphe. O buru onye awa nku be anoduje ezeru mgbabah iya. ¹⁰ O -buru l'ogbunku ta atudu nko; ophu onye awa nku abaduru iya ababa be oo-tukoje g'ike ha iya egbu; teme lo gbufu nku onya. Obenu lo kwa mmamiphe emeje g'iphe, nemadzu eme nweru iya ishi. ¹¹ Onye egudeje omamanshi eme g'agwo ta ata eru -gbē haa ya; o taada teme o meahaa ya be iphe, oome buanaa ke mmanu. ¹² Opfu, shi onye maru iphe lonu emeje g'a kwabe iya ubvu. Obenu l'onye-eswe bu iphe, o pfutaru lonu egbuje iya. ¹³ Iphe, onye-eswe saru onu wata epfufu abujeru iphe, enwedu ishi. Teke o pfugheru iya epfughe; iphe, o pfushiru aburu beriberiberi iphe, adudu iphe, o bu. ¹⁴ Opfu onye-eswe be anoduje anwushi anwushi. O to dudu onye maru iphe, e-me l'iphu. Ebe o dudu onye adu ike akaru iya iphe, e-mechaa mee nu me o toepho azu.

¹⁵ Nsegbu akanya, onye-eswe ese emeje ike abvu iya; o to maeduru uzo unuphu.

¹⁶ Su-a; nshio oha ophu bu nwatanshi bu eze phe; teme ndu-ishi l'oha ono buerupho gwogwoogwo be ephe agbeshije l'utsu eri. ¹⁷ Ehu-utso be a gokwanuru nu oha ophu eze phe shi l'oke unuphu; teme ndu-ishi l'oha ono buru ndu eri iphe l'orwuberu iya; ndu eri iphe g'ehu shihu phe ike; ndu abuedupho olwe-kporokporo be ephe bu.

¹⁸ Onye enyiru be ulo iya ezejekwa kpuru. O buru teke o jiru eka ye l'iphu utapfu be ulo obu awataje eshi eshi.

¹⁹ Obo-iphe bukwa iphe, aabo-dojeru iya bu g'e mee kwakiri kwakiri. Mee buru g'ehu tso utso be aangu-dojeru iya. O bekwanu l'oo okpoga bu eka iphemiphe jeberu o sibe ishi.

²⁰ Su-a; ta adukwa teke aa-nonya li phuahaa onye eze iphu; o rwuhaa o buru l'ime obu ngu. Ebe o dukwa teke aa-nonya gi nodu l'ime ulo ngu su l'iiphu onye nweru iphe iphu. Noo le nwenu, ephegbaa ephephe; me iphe ozo, nweru nkū be a-turutakwa iya je edooru iya.

Umere onye kwaru enya

11 ¹ Woru nri ngu chie le mini; kele a -noepho ujiku olemole be ii-huma iya-a. ² Hata iphe ngu keeru umadzu esaa; mbu-a; keeru iya umadzu esato; kele i ti madu ejo-iphe, e-mechaa nwua l'eliphe-a.

³Igwe -rwua ji alì bẹ oodzejeru eliphe mini. Oshi, daru adada -daru laa l'uzo ndohali-o; o daru laa l'uzo isheli-o; o buẹpho ẹka iya ophu o daru laa bẹ oo-zẹ. ⁴Onye eme ele pherephere bẹ ta akọbekwa iphe l'alì. Ophu onye ele igwe ẹnya l'iphu adukwa iphe, oo-meta l'opfu iya. ⁵Oo g'i tì madu uzo, pherephere eshije; ophu i madu gẹ nwaswa eshije kpua l'ẹpho ne iya-a; bukwapho g'iphe, Chileke eme tee dodu ngu ẹnya; mbụ Chileke, meru iphemiphe. ⁶Kua mebyi iphe, iiku akuku l'utsu. Ophu i dobekwa ẹka doo l'uzenyashi; kele i tì madu ophu e-mechaa dọ ree. ?Bụ owa-a; tọ ophu; tọ ẹphenebo e-mechaa dukota ree?

⁷Iphóró dọ ree; tẹme ẹnyanwu nọdu aduje ree ele ẹnya. ⁸Nemadzu -dzukpoo ndzu nọ apha olemole; g'ọ nọhabe; g'ẹhu tsoje onye ono utso l'apha ono g'ọ hakota. G'ọ nyatajẹkwa nchi ejihu iya; kele mbọku k'ono adukwapho igwerigwe. Iphemiphe, abyakpoo ememe tukokwaru bukotaru iphe-mmanu.

Anyata Chileke l'okoroḅya

⁹G'ẹhu tsoje ngu utso; gube nwokoroḅya; teke i bu okoroḅya. Tejekwa ẹswa teke ẹhu nwata dukwadu ngu. Iphe, ii-nọdu etso bu iphe, obu ngu pfuru ngu; yee iphe, i gude ẹnya ngu huma. Ole oo g'i nyatakwa l'iphemi-phe ono bẹ Chileke e-mechakwaa kpee ngu ike iya.

¹⁰Oo ya bu; haa ayọ oshi l'ime obu ngu! Tuko iphe, egburwashì ngu ẹhu g'ọ ha gwobekota; kele abụ okoroḅya; yee teke okpehu ngu dzuru edzumedzu tukokwaru buru iphe-mmanu.

12 ¹Su-a; nyatakwa onye meru ngu nu teke i bukwadu okoroḅya; tẹme ejo mbọku ono erwua; mbụ apha g'apha ono, ii-wata epfu su: "Iphemiphe-a ta adukwa ophu atso mu utso." ²Teke ono bẹ ẹnyanwu a-wata ngu adu inyeku inyeku. Iphóró l'ophu; mẹ onwa; waa kpokpode atukokwapho dọ ngu inyeku inyeku. Teke ono bẹ mgboko a-dụ g'ẹka igwe dzechaaru mini; urwukpu gbakahu. ³Teke ono bẹ ndu eche unuphu nche a-wata aphu kpaakpaakpaa. Tẹme umadzu labo ono, bu oke, dọ ike ono awata eje ephuru ephuru. Ndu egwe iphe egwegwe egwebuhu iya; noo kele ẹphe ta aduedu igwerigwe. Tẹme ndu ono, agbeje le windo pyofu ẹnya ono awata aphu ragaraga.

⁴Teke ono bẹ aa-guchishi oguzo, nọ l'uzo, e shi abahu le mkpukpu. Iphe, eegwe egwegwe adahaa ngu inchi inchi. Teke ono bẹ nemadzu e-tehuje mẹ iphe-odu ha ẹnu. Ole olu ebvu phe a-nọduje ada iya ẹnyi ẹnyi. ⁵Teke ono bu teke amadu atsua iphe, ha l'eli ebvu; bya atsua ebvu iphe-ẹhuka, nọ l'uzo; mbụ teke oshi alumondu atu ige; tẹme igube nọdu akpuwa rigorigo; tẹme ophu egu ejepfu nwanýi aguهدu. Noo teke nemadzu a-tuchi lashia ẹka oo-nọ ojejoje; ndu akwa iya nu e-tsoru gbororo erwu erwubvu iya. ⁶Nyatakwa onye meru ngu nu; tẹme l'a gbabua udo, e gude mkpola-ochaa swia; mbụ tẹme l'a tukpo ochi mkpola-ododo,

eegudeje ese mini lẹ wẹlu ono. Nyatakwa iya; tẹme l'eetsukpọshia ite-mi-ni, eesejeru mini ọbu ye; mbụ tẹme l'eemebyishia igwe, eekobeje eri ono, e gude ese mini lẹ wẹlu ono. ⁷Noo teke ogwẹhu, bụ ẹja alị a-laphu azụ l'ẹja alị ẹka o shi; unme ndzụ alapfu Chileke onye nuru iya nụ.

⁸“Sụ-a; iphe-mmanụ yẹ iphe-mmanụ bụ iphe-mmanụ. Iphemiphe tukuror bụru iphe-mmanụ!” Noo olu mube O-zì-iphe.

Mkpọchi-ishi iya

⁹Sụ-a; onye ziru iphe-a ta abulekwa-a l'ọ maru iphe; obenu l'o meru ndu ọzo ẹphe nwuta iphe. Ọ riru ọriri bya avo iphe avo; bya anmaa ẹtu ẹtu doo giriri. ¹⁰O-zì-iphe ono toru nwehu hoo opfu, rwuberu l'epfufu ahoho; k'ọphu bụ l'iphe, o deru pfuru nhamunha bya aburu okpobe opfu. ¹¹Lopfu onye maru iphe adujekwa ge mpyipyi oshi, unwu-eswi egudeje eche eswi. Teme ẹtu ẹtu, Onye Eche Aturu ono nmashiru kube nodu angubajeeppo anguba ge nggu, a kporeru kpọshia ike.

¹²Ọo ya bụ; nwa mu; g'iphe ọwa-a, mu abya epfufu-a bukwaru iphe, a-nodu alo ngu ẹka lẹ nchi. Aa-nodukwa ede ekwo, du igwerigwe igwerigwe; ọphu e debuhudu iya edebuhu. Obenu l'anwunuka ekwo emejekwa ge nemadzụ kpọjohu.

¹³Nta-a be a tukowaru iphemiphe numakota. Waa iphe, bụ mkpochi-ishi iya baa: Tsuje Chileke ebvu meje iphe, o suru g'i mee; kele ọo ya bụ iphe, rwuberu amadu l'ememe. ¹⁴Kele iphemiphe, nemadzụ eme be Chileke e-mechakwaa kpee ya ikpe iya; mekpoo iphemiphe, nemadzụ mekotaru l'edomi; me ndu ọphu du ree; me ndu ọphu du eji.